



**OPĆINSKI NAČELNIK**

**MUNICIPALITY MAYOR**

Broj: 05/2-11/3-1005/26  
Velika Kladuša, 04.06.2026. godine

Na osnovu člana 70. stav, člana 69. i člana 2. stav (1) tačka l) Zakona o javnim nabavkama („Službeni glasnik BiH“, broj: 39/14, 59/22 i 50/24), člana 5. i 8. Pravilnika o uspostavljanju i radu komisije za nabavke („Službeni glasnik BiH“, broj: 103/14) i člana 43. Statuta Općine Velika Kladuša („Službeni glasnik Općine Velika Kladuša“, broj: 12/11), u predmetu otvorenog postupka za nabavku usluge – Elaborat eksproprijacije sekundarne kanalizacione mreže u zoni „E“ na području Općine Velika Kladuša, a po preporuci Komisije za javne nabavke, Općinski načelnik Općine Velika Kladuša, donio je

**ODLUKU**  
**o dodjeli ugovora**

1. Prihvata se ponuda ponuđača „**Institut za građevinarstvo IG Banja Luka**“ d.o.o. Banja Luka, sa konačnom cijenom od 3.954,55 KM bez uračunatog PDV-a, dostavljena Ugovornom organu po JN broj: 299-1-2-41-3-68/26 od 28.04.2026. godine, te se Ugovor o javnoj nabavci usluge - Elaborat eksproprijacije sekundarne kanalizacione mreže u zoni „E“ na području Općine Velika Kladuša, dodjeljuje imenovanom ponuđaču.

2. Po pravosnažnosti ove Odluke, Ugovorni organ će pozvati izabranog ponuđača radi zaključenja Ugovora koji reguliše međusobna prava i obaveze vezane za predmetnu nabavku shodno zahtjevima Ugovornog organa navedenim u tenderskoj dokumentaciji i propisima koji regulišu postupke ugovaranja.

3. Ova Odluka objavit će se na službenoj web stranici Općine Velika Kladuša, u skladu sa članom 70. Zakona o javnim nabavkama BiH („Službeni glasnik BiH“, broj: 39/14, 59/22 i 50/24).

**Obrazloženje**

Na osnovu Posebne odluke Općine Velika Kladuša broj: 05/2-11/3-1005/26 od 27.04.2026. godine, pokrenut je na Portalu javnih nabavki dana 28.04.2026. godine postupak za javnu nabavku usluge - Elaborat eksproprijacije sekundarne kanalizacione mreže u zoni „E“ na području Općine Velika Kladuša.

Javna nabavka provedena je putem otvorenog postupka za dostavljanje ponuda, a kao kriterij za dodjelu ugovora odabrana je najniža cijena tehnički zadovoljavajuće ponude. U skladu sa članom 35. Zakona o javnim nabavkama BiH („Službeni glasnik BiH“, broj: 39/14, 59/22 i 50/24). Obavještenje o javnoj nabavci broj: 299-1-2-41-3-68/26 objavljeno je na Portalu javnih nabavki (ejn.gov.ba), dana 28.04.2026. godine. Procijenjena vrijednost nabavke iznosi: 5.000,00 KM.

Krajnji rok za dostavljanje ponuda bio je 19.05.2026. godine do 14:00 sati, a javno otvaranje ponuda izvršeno je 19.05.2026. godine u 14:15 sati, što je konstatovano Zapisnikom sa otvaranja ponuda od 19.05.2026. godine.

Komisija za javne nabavke u Zapisniku o pregledu i ocjeni ponuda broj: 05/2-11/3-1005/26 od 19.05.2026. godine konstatovala je da je Tendersku dokumentaciju preuzelo 19 (devetnaest) ponuđača, a da su nakon isteka krajnjeg roka za dostavljanje, pristigle 3 (tri) ponude od strane ponuđača i to:

1. **Institut za građevinarstvo „IG“ d.o.o. Banja Luka**, sa ponudenom cijenom od 3.954,55 KM bez uračunatog PDV-a,
2. **„INVEST GROUP BH“ d.o.o. Sarajevo**, sa ponudenom cijenom od 3.954,55 KM bez uračunatog PDV-a,
3. **„AMGEO“ vl. Belkisa Kaldžija, Velika Kladuša**, sa ponudenom cijenom od 3.500,00 KM bez uračunatog PDV-a,

Nakon izvršenog otvaranja ponude Komisija je pristupila analizi dokumentacije priložene uz ponude u smislu njihove validnosti, obzirom na iskazane zahtjeve Ugovornog organa u Tenderskoj dokumentaciji, odnosno vrednovanju ponuda, a u skladu sa procedurama i pravilima utvrđenim Tenderskom dokumentacijom i Zakonom o javnim nabavkama BiH, odnosno pripadajućim podzakonskim aktima.

Analizom dokumentacije dostavljene uz ponudu Komisija je utvrdila da ponude ponuđača: „**Institut za građevinarstvo „IG“ d.o.o. Banja Luka** , **INVEST GROUP BH „ d.o.o. Sarajevo** i „**AMGEO“ vl. Belkisa Kaldžija, Velika Kladuša** ispunjavaju formalno-pravne i tehničke zahtjeve Ugovornog organa, te su kao takve prihvatljive.

E-aukcija nije predviđena u ovom postupku javne nabavke, budući da se radi o intelektualnim uslugama za koje ZJN nije predvidio istu.

Shodno navedenom, Stalna komisija za javne nabavke je u svom Izvještaju o radu Komisije - Zapisnik broj: 05/2-11/3-1005/26 od 19.05.2026. godine dala preporuku Općinskom načelniku da donese Odluku o dodjeli ugovora za javnu nabavku usluge "Elaborat eksproprijacije sekundarne kanalizacione mreže u zoni E na području Općine Velika Kladuša", ponuđaču „**AMGEO“ vl. Belkisa Kaldžija, Velika Kladuša**, sa konačnom cijenom od 3.500,00 KM bez PDV-a, kao najpovoljnijem ponuđaču, odnosno da da saglasnost na Izvještaj radi provođenja daljnjih aktivnosti na realizaciji postupka nabavke u skladu sa odredbama Zakona i Općih akata, te je isti dostavljen Službi za finansije, računovodstvo i javne nabavke.

Dana 03.06.2026. godine, predmetni spis vraćen je Stalnoj komisiji za javne nabavke uz akt broj: 05/2-11/3-1005/26 od 03.06.2026. godine, kojim je Komisija obaviještena da je pravobranilaštvo dana 02.06.2026. godine donijelo Mišljenje broj: M-59/26, a po zahtjevu Službe za finansije, računovodstvo i javne nabavke, te je od Komisije traženo da razmotri isto i donese konačan stav vezan za predmetnu nabavku.

U Mišljenu pravobranilaštva broj: M-59/26 od 02.06.2026. godine se navodi: „Uvidom u cjelokupni spis predmeta koji se nalazi kod nadležne Službe za finansije, računovodstvo i javne nabavke **Općinsko pravobranilaštvo je utvrdilo da u navedenom slučaju postoji sukob interesa u smislu člana 52. Zakona o javnim nabavkama BIH.**

Naime, odredbe člana 52. Zakona o javnim nabavkama koje se odnose na diskvalifikaciju po osnovu sukoba interesa ili korupcije su nedvosmisleno jasne, ali istaći ćemo bitne stavove istog koji ukazuju na postojanje sukoba interesa u gore navedenom predmetu.

Stav (2): "Sukob interesa između ugovornog organa i privrednog subjekta obuhvata situacije kada predstavnici ugovornog organa, koji su uključeni u sprovođenje postupka javne nabavke ili mogu uticati na rezultat tog postupka, imaju, direktno ili indirektno, finansijski, privredni ili bilo koji drugi lični interes koji bi se mogao smatrati štetnim za njihovu nepristranost i nezavisnost u okviru postupka, a naročito:

- a) ako predstavnik ugovornog organa istovremeno obavlja upravljačke poslove u privrednom subjektu, ili
- b) ako je predstavnik ugovornog organa vlasnik poslovnog udjela, dionica odnosno drugih prava na osnovu kojih učestvuje u upravljanju, odnosno u kapitalu tog privrednog subjekta sa više od 0,5%."

Stav (3): "Predstavnikom ugovornog organa u smislu ovoga člana smatra se:

- a) rukovodilac, te član upravnog, upravljačkog i nadzornog organa ugovornog organa;
- b) član komisije za javnu nabavku;
- c) drugo lice koje je uključeno u sprovođenje ili koje može uticati na odlučivanje ugovornog organa u postupku javne nabavke.

Stav (4):“Odredba stava (1) ovog člana na odgovarajući način se primjenjuje na srodnike po krvi u pravoj liniji ili u pobočnoj liniji do trećeg stepena, srodnike po tazbini do drugog stepena, bračnog ili vanbračnog druga, bez obzira na to da li je brak prestao, te usvojioce i usvojenike (u daljem tekstu: povezane osobe) prestavnika ugovornog organa iz stava (3) ovog člana.“

Imajući u vidu da je projektni zadatak i tehničku specifikaciju u postupku nabavke pripremio i potpisao Dženan Kaldžija kojeg u ovom slučaju smatramo predstavnikom ugovornog organa odnosno : „ drugim licem koje je uključeno u sprovođenje“ - direktno, pa je isti čak i rukovodilac – šef odsjeka za imovinsko pravne i geodetske poslove ugovornog organa, odnosno odsjeka koji je sastavni dio Službe za prostorno uređenje, imovinsko pravne i geodetske poslove – službe koja je podnijela predmetni prijedlog za nabavku, a kao najpovoljniji ponuđač kojeg je komisija predložila Općinskom načelniku je određen „AMGEO“ vlasnice Kaldžija Belkise koja je u bračnoj vezi sa navedenim predstavnikom ugovornog organa, **jasno je postojanje sukoba interesa i primjena odredaba člana 52. Zakona o javnim nabavkama BiH.**


**Nadalje bitno je istaknuti stav (11) istog člana, koji glasi: „Ugovor o javnoj nabavci sklopljen suprotno odredbama ovog člana je ništavan“.** Shodno navedenom Općinsko pravobranilaštvo je iznijelo svoj jasan stav u skladu sa važećim zakonskim propisima.

Kako je nadležna služba pribavila pravno mišljenje Općinskog pravobranioaca u kojem je konstatovano postojanje sukoba interesa i ukazano na primjenu odredbe člana 52. Zakona o javnim nabavkama BiH, Komisija je razmotrila navedeno mišljenje te Općinskom načelniku Općine Velika Kladuša dala preporuku, da se prilikom donošenja Odluke o dodjeli Ugovora vodi dostavljenim Mišljenjem broj: M-59/26 od 02.06.2026. godine. Slijedom navedenog, Komisija preporučuje da se ugovor ne dodijeli prvorangiranom ponuđaču, već drugorangiranom ponuđaču **Institut za građevinarstvo „IG“ d.o.o. Banja Luka**, sa ponuđenom cijenom od 3.954,55 KM bez uračunatog PDV-a.

Cijeneći navedeno, na osnovu odredaba Zakona o javnim nabavkama BiH, odlučeno je kao u dispozitivu Rješenja.


UPUTA O PRAVNOM LIJEKU: Svaki ponuđač koji ima legitiman interes za konkretan Ugovor o javnoj nabavci i koji smatra da je Ugovorni organ u toku konkretnog postupka dodjele ugovora prekršio jednu ili više odredbi Zakona o javnoj nabavci BiH ima pravo uložiti žalbu u roku od 10 (deset) dana od dana kada je primio Odluku, odnosno Obavještenje o dodjeli Ugovora. Žalba se podnosi Ugovornom organu, kao prvostepenoj instanci u žalbenom postupku, u tri primjerka direktnom predajom kod Ugovornog organa ili preporučenom poštanskom pošiljkom.

Obrađivač:

  
Aida Čerimagić

Kontrolisao:

Pomoćnik Općinskog načelnika  
za finansije, računovodstvo i  
javne nabavke

  
Sebića Dervić Melkić



DOSTAVITI:

1. Učesnicima u postupku, 3x,
2. Služba za upravu, društvene djelatnosti i zajedničke poslove (web stranica),
3. U spis.